



ЛҮИМӐ СЭРИПОС

www.khanty-yasang.ru

Общественно-политическая газета

E-mail: luima@ugracom.ru

Основана 11 февраля 1989 года

6 июня
2014 года
№11
(1077)

**Лүптӓ ӓтпос ӧвыл хӧталэ –
нӓврамаквет ӓргалан хӧтал**

Ты
номерт
ЛОВИНЬТЭН:

Нӓврамыт
ӓргалавет

3

Лӓтнӓв ул вос
ӓрувлылӓв

8

Сӓлың мӓхманув
хӧнтлын накт
нӓтсыт

12-13

Тӓлыглапыт
хурин
пӓслысанэ

14-15

Нӓврамыт
янытлан
хӧтал

16



Л. Теткина вӓрум хури

Сапрāнит сāв тēлат урыл потыртасыт

Ювле хульгум этпост округ правительството кўщаит сапрāнин акванатхатыгласыт ос сāвсыр сākконыт ēрнэ лātңыл хассаныл. Акв сапрāнит округ губернатор Наталья Комарова тав пуңктотыс ос мōтанēt Геннадий Бухтин. Кўщаит сāвсыр тēлат урыл потыртасыт.

Округув янытыл вōр нōх-пēламлаңкве патыс. Ты элы-пālт ұсытыт ос пāвлытыт нāй харыгтан колыт пуссын ēмшаквег щēпитахтуңкве лāввёсыт. Нāй харыгтан утыт ēрнэ торыг мўсхалыг вос рўпитасыт ос акваг уральтым вос őшвёсыт. Ты őвылтыт тāн природный ресурс департамент пāлыл лātңыл хўлтыглымат.

Тот кўщаиг őлнэ хум Евгений Платонов лāвыс: «Округувт яңк нātнэ этпос кит сāt сыс китхуйплов мāt нāй őвыл ēмтме тāра-паттысанўв, та сыс вōрт 88,8 гектар сāвит мātэ нāйн ёсвес. Мāхум ялпың хōталыт порат вōрт ўшлахтасыт, вōраяңкве ялсыт.

Мā-витув ань авиация ос вōр уральтан служба пāлыл ўргалāлым őнышаве ос

тот нāй пистам ēмтнэ порат тāн тāра нāй лап-харыгтыяныл. Тыи мāгыс 13 организацият рўпитēгыт».

Вера Дюдина, округ бюджет олныт ловиньтан нē, потыртас, ты тāl хўрум этпос сыс тāн 39 миллиард 917 миллион арыг солкōви сэлсыт. Мōлты тāl тыгыл мощчанувēг őлыс. Ань сāвнув олн налог щирыл атсыт. Ос та олнытыл 34 миллиард 180 миллион солкōви сāвсыр программат мāгыс холтвёсыт. Сāвыңпālэ олныт мāхум хаништан ос пусмалтан вāрмалит мāгыс тастымат. Мōт пālэ мирн нētмил вāрнэ, колыт ўнттын ос лēңхыт пиннэ мāгыс, ЖКХ, пāвлың ос вōрың хозяйстват нōх-вōрмалтаңкве уртвёсыт.

Туи порат хаништахтын нāврамыт хотты мāt рўпитаңкве ку-

сылēгыт кос. Тамле тēлат тармыл пуңктотнэ хōтпат кāсың нāврам ēт ēмшакв вос потыртахтēгыт ос матыр нētмил тāнанылн вос вāрēгыт. Ты программан ос янас олн тастым őлы. Тувыл Алексей Варлаков, рўпитан мāхум ос тāн тēланыл ўргалан департаментыт кўшай хум, акв йильпи проект урыл потыртас. Ань хотты предпринимателит кāсашим матумпāла хōтпат тāнки палтаныл рўпитаңкве выганыл ке, тāн грант-олныл нēтаветтах.

Ётылнув кўщаит Геннадий Бухтинын китыт сапрāнин акван-атыглавёсыт. Тāн őвлēt ЕГЭ вāрмалит урыл потыртасыт. Премьер-министр РФ Дмитрий Медведев ты урыл ос лāтың вāрыс. Ты тāl российский итоговый аттестация щирыл Крымт ос Севастополь ўст школа āстлан нāврамыт őвыл щēs номтаныл āрталавет тах. Округувт экзамен пирмайтан мāгыс колыт ēмшакв щēпитавёсыт. Пус-

сын őлыглан вāрмалит кўщаит тāнки кос хотыл ищхйпың утыт хосыт уральтаңкве вēрмияныл.

Тувыл «Партнер» нампa компания правительствав ēт аквѣт рўпитан соглашение-нēпакыт ловиньтасыт. Тāн мāхумн őлнэ колыт ўнттын тēлат урыл лāвхатēгыт. Кол ўнттын ēрнэ пормас тāнки вāрēгыт ос колыт молях ўнттыяныл. Ты коныпал рўпататāl őлнэ хōтпат тāнки палтаныл рўпитаңкве выганыл. Сургут ўст кол ўнттын пормасыт вāрнэ завод ўнттуңкве вēрмēгыт. Кўщайтн тамле тēлат мўстысыт ос тāн ты вāрмалит элаль тотуңкве лāвыс.

Мōт договор-нēпакт «Дорожный карта» őвылтыт хансым őлыс. Тав кастылэ, тāн образование, наука, культура ос здравоохранение вāрмалит тāра-паттысаныл ос манах солкōви тув холтēгыт, таи āрталасыт.

**Тамара
МЕРОВА**

Мōйтыт ос потрыт хансēн

Мāньщи мōйтыт ос потрыт хансум мāньщи эква Анна Конькова номылматыглан кастыл ань округувт кāсың тāl нāврамыт мāгыс конкурс вāрыглаве. Ты конкурсын нēлоловхуйплов тālаныл иң ат тōвлын āгит-пыгыт тāн тув хансуңкве вēрмēгыт. Тув акв, кит, хўрум потыр соссаң мир őлупса урыл хансуңкве рōви. Тот тамле номинацият щирыл потрыт вивет: «Стихотворение», «Потыр» (эссе, новелла), «Мōйт» (пēs йис потыр), «Миф».

Ты конкурсын рўпата кētнэ мāгыс нāврамытн őвлēt заявка-

нēпак хансуңкве ēри. Тувыл ос ты тēла культура Департамент лōпсыт <http://www.depultura.admhmao.ru> тāра-паттуңкве рōви. Нāнки потрын ос заявкан ты адрес щирыл кētэн: электронный адрес Cultura-ugra@admhmao.ru, пишман ос ты адресын: Ханты-Мансийск ўс, ўсхулы Мира, кол 14а, 207 колнак. Рўпатанын лўпта этпос 30 хōталэ мус кētуңкве вēрмияныл.

**Культура Департамент кētум
потре мāньщи лātңыл
Николай МЕРОВ хансытэ.**

Ты элы-пāl №10 газетат (23.05.2014 тāлт) титхуйпловит лōпсēt газетав вāрнэ руц мāхманув ищхйпың утувт мāньщи лātңагув лўльсаң хасманыл. Тāн тох хасмыт - «Сбылы ўрнэ хум». Лātңыт тох хансуңкв кос эрыс - «Сāлы ўрнэ хум». Мāньщи лāтың вāнэ хōтпа, вāим тāра торгамтытэ, тамле лāтың āтим - сбылы, мāн лātңувт туп тамле лāтың őлы - сāлы.

Ос ань таи емас, ищхйпың утыт, тав интернетыг лāваве, ты лātңагув ēмшакв хансым őлэг. Хотыют газетав тот ловиньтытэ, потранув пуссын мāньщи ос руц лātңыл тот хансым őлэгыт.

КҮЩАИТ РҮПАТАНЫЛ



Няврамыт ўргалавет

Няврамыт ўргалан щирыл округ янытыл Рүпитан нэ Татьяна Дмитриевна Моховикова ос мән мәвт өлнэ савалап няврамыт тәланыл палт күщайг өлнэ нэ Елена Владимировна Немчинова ляххал тотнэ мәхум элы-палт няврамыт олупсаныл урыл потыртасыг.

Тән ләвнэтән щирыл, ювле хультум тәл сыс 700 арыгтем няврам ос яныгхотпат нётмил кысыт, янгыщ ань өлнэ кол урыл китыглахтасыт.

Т.Д. Моховикова тох ты потыртас: «Юва ўсыт манос районьгт рүпитан күщайт тәланыл ёмашакв ат вәрияныл. Савалап няврамыт нётмил рётыл тән палтаныл такос ялантэгыт, ат иң хунтлавет, пуңканыл ёлтартым кон та минэгыт. Агмың-мосың няврам өщнэ колтагыл ос сака сав, тән ос нётмил такос вөвёгыт, нәмхотыютн атпыл хұлавет. Мән касың тәла уральтылүв, пуссын нётыянүв. Ос хунь ләтғанув акван ат ёхтэгыт, сутытахтэв.

Ань ты вәрнэ рүпатав хосыт мөлты порат Сургутский ос Нефтеюганский районьгт нила колтагыл өлнэ колыл майвёсыт. Касыңе агмың-мосың няврам оныщи, күщайт тәнанылн нётуңкве шар ат тахсыт. Округув янытыл күщайт хұрум ўст шар мак ёмашакв рүпитэгыт – Ханты-Мансийск, Нягань ос Мегийон. Мот мāt өлнэ хотпат тай элаль нас пувтыянүв,

молямтыянүв, ань кәсың няврамн вос нётэгыт, пуссын өлнэ колыл вос мивет.

Округувт олупса ань сака ёмас, няврамыт савсыр нётмилыл вәравет, садикыт ос школат ўнттавет. Таимәгыс тыт ань сав няврам самын паты. Ювле хультум тәлт 27 сөтыра 876 няврам самын патыс.

Савалап няврамыт халт 95,7% савит колтагылн олукве вуйвёсыт, няврам өщнэ колт мощца няврам хультыс. Мән рүпатавт мак таи, ань няврам такви щәняге-ащаге ёт вос олы. Мөлты тәл 200 савит хотпа тәнти нявраманыл ювле майвёсыт. Тувыл касың тамле колтагыл мән акваг уральтылүв, нётылүв».

Яңк нәтнэ этпос 15 хөталэ – колтагыл ялпың хөталыг олыс. Ты хөталт мә янытыл өлнэ мир пуссын мүйлэгыт, касың колтагыл янытлаве. Татьяна Дмитриевна ос Елена Владимировна округт өлнэ мәхум пуссын ты хөталыг янытласанән, сав ёмас сымың ләтың ләвсыг.

**Светлана
ХОЗУМОВА**



Агмың агит-пыгыт ёнгын утыл мүйлуптавёсыт

Мәньполь этпос 22 хөталныл яңк нәтнэ этпос 22 хөталэ мус округувт «Коробка храбрости» намба акция рүпитас. Этпос сыс акв сөтыра арыгкем элумхөлас агмың няврамыт мәгсыл ёнгын утыт кётсыт.

Тамле тәла Татьяна Моховикова, няврамыт ўргалан нэ, тав вәруңкве лавыс. Акван-атим мүйлупсат тав Ханты-Мансийск ўст пүльницат пусмалтахтан няврамытн мүйлуптасанэ.

Татьяна Дмитриевна лавыс, хунь тән тамле рүпата вәруңкве номылматсыт, өвлэт туп рак-агм өщнэ агирищит-пыгришит мәгсыл мүйлупсат акван-атсыт. Тувыл мощ номсахтым, тән торгамтасыт, мот агмың няврамаквет ос савсыруколыл гүщтавет ос мот сав агмың процедурал вәравет, тән ос лөньщёгыт ос савалэгыт. Тыи мәгсыл «Коробка храбрости» намба тәла тән пуссын агмың няврамыт мәгсыл вәрсыт. Пүльницан ялме порат тав педиатрический отделения пусмалтахтын няврамыт

ёт хонтхатыглас ос мүйлупсал мисанэ.

Татьяна Моховикова округувт өлнэ мәхум ос Нефтеюганск ўст «Светозар» савалап няврамыт колн мүйлупсат мәгсыл яныг пүмашипа ләтың кётыс. Тамле ёнгын ут акван-атнэ мәхум няврамытн сав щәгт тотэгыт, ос няврамыт хунь щәгтэгыт, мувиньтэгыт, тонт моляхнув пусмалтахтэгыт.

Лүпта этпос хұрмит хөталэт няврамыт уральтаңкве Татьяна Моховикова Нижневартовск ўсн ялыс. Тот тав пувласпи-агм пусмалтан няврамыт ёт хонтхатыглас ос пуссын ёнгын утыл мүйлуптасанэ.

Күщай нэ лавыс, тамле акция тән вәтихал вәрыглаңкве патэгыт.

**Людмила
ТАСМАНОВА**

Юнтупытыл пусмалтан лёккар

Нефтеюганск үс ляпат «Юган» намба санаторий օлы. Мәхум тот янге-мәне пусмалтахтәгыт. Мәньщи ос ханты мәхум павыл лёккаранылы тув вәтихал кётыглавет. Ам тув ялмум порат юнтупытыл пусмалтан лёккар ёт потыртасум, наме Наталья Владимировна Гарбуз. Элаль нән ань тав потре ловиньтәлән.

– Ам Самарский область Отрадный үст самын патсум. Нефтеюганск үсн 1968 тәлт омагум-әтягум ёт ёхтысум, школа тыт әстласум. Тувыл Тюмень үсн медицинский институтн ханищтахтуңке минасум, 1982 тәлт әстласум. Өвләт «Юганскнефтегаз» намба медсанчастит мәнь нйврам пусмалтан лёккарыг рүпитасум.

Нйврам үримам тәрвितыңыщ օлмум сьс, ам ханищтахтан курсытн ялантасум, юнтупытыл пусмалтаңке ханищтахтасум. Элаль Пятигорск ос Москва үсыт ханищтахтасум, рефлексотерапевт лёккарыг патсум. Ты санаторият 1991 тәл пәсыл рүпитәгум, мәхум юнтупытыл тўщтым пусмалтыяnum. Тыт рүпитанәм сьс вәтихал ханищтахтәләгум.

1991 тәл порат тыг Китай мәныл лёккарыт ёхталасьт. Руш ләтңыл потыртаңке ат хәсьыт, английский ләтың мощ вәсьыт. Ам ань ты мот хон ләтың օс вәглум, ләтңаныл толмашлаңке нётсанум. Тән ос әнум юнтупытыл пусмалтаңке ханищтасаныл. Тувыл Новокуз-

нецк, Новосибирск, Челябинск үсыт ханищтахтасум, ты коньпал сәв нәпак ловиньтасум.

Ты рүпата сака пұмыш, кәсьың хөтпан тав яныг парьс тотуңке вёрми. Ты щирьл пусмалтан лёккарын акваг әри ханищтахтуңке ос сәв нәпак ловиньтаңке. Әлумхәлас алпитә сәв точкат օньщи, кәсьыңе янас әгм пусмалты. Таимәгыс тәнаньл пуссын ёмашакв вәңке әрәгыт. Нәпакытт ты урыл сака сәв хансьым օлы.

Юнтупытыл пусмалтан вәрмаль руш щирьл рефлексотерапияг ләваве, ты пәс йис пусмалтан тәла. Тав Китай мāt тәра-паттувес. Мәхум юнтупытыл пусмалтаңке тот ты օвылтавёсьыт. Тувыл Корея мāt лёккарыт тох пусмалтаңке патсьыт, намаясаныл Суджок-терапия. Ты сака ёмас пусмалтан вәрмаль, тав кәсьың хөтпан нёты. Ань тәрпит аёв, тувыл мот матаранүв әгмыңыг ёмтәгыт, сәвсьыр аллергия әгмыт нөх-хулигләгыт, хөтпа алпитә лошгуңке паты та маньр. Ос ты пусмалтан вәрмалюв әти тох - Әлумхәлас




Н. В. Гарбуз

юнтупытыл пусмалтахтаме юи-пәлт, нәматаре ат әгмың, номтә ёмас.

– Манах тәл яныт хөтпа юнтупытыл пусмалтаңке рөви, нйврамыт тох օс пусмалтавет?

– Хұрум тәлныл сәт тәл яныт нйврамыт мәньнүв юнтупытыл вәравет, нәматыр әгм ат суйты. Элаль ос яныгхөтпа хольт вәравет, вәритантәм օлы. Сәвсьыр нйврам օлы, тәва пилы, ёл ат ротми, тыгле-тувле нёвсьы, тәва ос туп хұрум тәлә, щар ат пилы, сәлтат хольт сохтыл хуи.

Яныгхөтпат нёлсәт нупыл ат тәл мус юнтупытыл пусмалтаңке рөви. Әгм օвләт сумыллалы, тувыл хотталы та сойми. Төванакт хөтпа ёл-ойилматаве, тәва нас хуйгалалы, ўцлахты.



Янге-мәне солвалың колнакт солвалыл лылтым пусмалтахтәгыт



Пусмалтахтан мәхум концертвәрыгләгыт.

ХАНИЩТАП

– Наталья Владимировна, наң ань лёккарыг ты рӯпитэ-гын, таяныт ёмас вәрән, ләвен, пустагыл олнэ магыс хотпан маныр эри вәруңкве, хумус олуңкве?

– Ам китаецыт ёт сәв рӯпитасум, тән тох ләвэгыт: «Нән, Россият олнэ мир, хунь сака агмыңыг ёмтэгын, уц та номсуңкве патэгын: хумус пусмалтахтуңкве, манхурип тәрпи аюңкве эри. Уц та хонтылын. Ос мән, китаецыт, ты урыл мән тәгыл номсэв. Пустагыл олнэ вәрмал мән олнэв палыт ханищтылүв». Мүтраң китаецыт сөль ләвэгыт, ань махманув номсэгыт: мән пүльницат лёккаранувн пусмалтавев, тәрпил мивев, пусмев тах. Ати, тох олуңкве щар ат рөви.

Олнэ хоталанув урыл, алписованув урыл мантинанувн номсуңкве эри, лёккарытн мән сака хунь эрөв. Хотал палыт сәв вит аён, физкультура вәрән, мощ хүтсән. Вәтихал кон ёмыгтән, сыстам лылыёпыл лылтән, сәв мовиньтән. Касың хотал щәгтым олэлын.

Ань телевизор хосыт йонтупытыл пусмалтан вәрмал урыл тованакт люль потыр хулэв, тав эрттам хотпа ат пусмалты. Тамле полщ ань намыл тотаве, махум аптеканыл вос ялантэгыт, тәрпи вос ёвтэгыт. Тәрпи вәрнэ ос тыналан махум олн сэлэгыт, тәрпияныл ат те ёвтает, тананылн люль, олань нөх ат лапи.

Хотпа хунь матаре агмың, тәрпи аи, мот матаре агмыңыг ёмтапи. Тувыл тав мот агмың матэ магыс тәрпи ос та ёвты, юв-аялытэ, ты юи-пәлт ос хұрмит матэ агмыңыг ёмты. Тох акваг та пусмалтахты, тәрпиянән пусмалтан пентсыл витыг та тотаве.

Касың хотпа такви вос пусмалтахты, ляпа махманән вос нёты. Пустагыл ос сөтыңыщ олуңкве эри, касың элумхөлас эруптаңкве эри. Ос щар мак таи – Төрүм Ащув эруптэлын. Пуссын пустагыл олән!

Ань потрумән та оигпас.

Светлана
ХОЗУМОВА

Тән руц латың ханищтаңкв ләвавет

Мот хон мәныл ань акваг сәв махум рӯпитаңкве ос олуңкве тыг ёхтэгыт. Тән халанылт тованыл руц латңыл люльсан потыртэгыт, товат латың щар ат торгамтэгыт. Щөмьяң тәгыл ёхтэгыт, нывраманыл школан тыт минэгыт. Руц латың вәнэ тәл тананылн тыт ханищтахтуңкве сака тәрвитың.

Ты ныврамыт урыл кұщайт сапрәнит потыртасыт. Округ кұщай нэ Наталья Комарова общественный организациятт рӯпитан хотпат ос ханищтап щирыл рӯпитан махум тув вөвиньтәлсанэ.

Кұщай нэ тән нупылань ләвыс: «Сәвсыр мирыт журтыңыщ тонт олуңкве патэгыт, хунь тән руц латың ёмашакв ваңкве ос янытлаңкве патяяныл. Ань мот хон мәныл ёхтум махум тәнки руц латңыл потыртаңкве ат хасэгыт ос нывраманыл ат ханищтыяныл. Тамле ныврамыт школан миннэныл порат, руц латың ат торгамтанэныл магсыл, мұсхал щирыл ханищтахтуңкве ат вөрмөгыт. Ань тән щәняныл-әщаныл ёт рӯпитаңкве эри, тыт элалэ олуңкве ке кәсәщэгыт, руц латың вос ханищтэгыт».

Округ янытыл ты ныврамыт хумус ханищтавет, та урыл Лилия Максимова, ханищтап департаментыт рӯпитан нэ, потыртас. Тав ләвыс, ань мот хон мәныл тыг ёхтум 51% щөмьят тәнки халанылт ос нывраманыл ёт туп щәнь латңыл потыртэгыт, тыи магсыл тән руц латың ат вәгыт. Ань тамле ныврам сака сәв олы, яныг ұсытт тән магсыланыл школат пунсавет, тот пуссын ханищтавет. Ақв тамле школа Нефтеюганск ұст рӯпиты ос хұрум школа Нижневартоск ұст олы.

Наталья Комарова ханищтап щирыл рӯпитан департаментын ос миграционный службат рӯпитан махум аквьёт

рӯпитаңкве ләвсанэ. Ты ныврамыт щәняныл-әщаныл нэпаканыл мұсхалыг вос уральтияныл. Эрнэ нэпакыт ат ке оныщөгыт, тәнки олнэ мәнанылн ювле вос кәтавет.

Кұщай нэ элалэ ләвыс: «Мән тыт мәнки нывраманув магсыл школа ат товылхаты, тән кит смена щирыл ханищтахтэгыт. Мән мот хон мәныл ёхтум ныврамыт магсыл яныг школа пұнсэв, тув сәв олн тәстэв. Ты школат ос ёмашакв уральтән».

Сапрәнин ёхталам махум ос тәнки проектаныл урыл потыртасыт. Рустам хазрат Аминов Религиозный Духовный управление мусульман намба организацият рӯпиты, тав нывраманыл руц латңын ос тыт олнэ мирыт янытлаңкве хумус ханищтыяныл, та урыл потыртас.

Ань тән «Я знаю, я уважаю, и я изучаю русский язык» намба проект щирыл рӯпитэгыт. Нывраманыл ты урыл сәвсыр хурит пөслэгыт, потрыт, стихыт руц латңыл хансэгыт, латың ты щирыл ты ханищтэгыт.

Ос ақв та порат махум «Дни славянской письменности и культур» намба вәрмал урыл потыртасыт. Тамле ялпың хотал Ханты-Мансийск ұст яңк нәтнэ этпос 23-24 хоталэт олыс. Ты рӯпата таи магсыл вәрыглаве, руц махум тәнки щәнь латңаныл вос янытлэгыт ос пёс йис вәрмаляныл ул вос ёрувляяныл.

Людмила
ТЕТКИНА

«ВЫГЫР» НАМПА НЭПАК ЙИЛЬПИИГ НЭГЛЫС



Ханты-Мансийск ўст мѧ-вит ўргалан Департамент колт йильпи нѧпак суссылтавес. Тав руш лѧтңыл лѧваве - «Красная книга». Та нѧпакт округ янытыл мощщѧг хульгум ўйхулыт, вѧрт яныгман сѧвсыр лўптаң пумыт ос лѧхсыт урыл тот хансыма ос хурияныл суссылтавет. «ВЫГЫР НѧПАК» лов тѧл сыс акв щѧс вѧрыглаве.

Ты кастыл кўщаиг ѳлнѧ тит хумыг тув ѳхталасѳг. Акватѧ наме Евгений Петрович Платонов, тав округ янытыл мѧ-вит ўргалан Департамент тармыл кўщаиг ѳлы. Мѧтанѧ ос Сергей Владимирович Пикунѧ, тав мѧ-вит ос ўйхул ўргалым округ янытыл кўщаиг рўпиты.

Вѧрмаляныл ѳвылтан порат кўщаиг мѧхум янытлан мѧгсыл потыртаңкв вѧвыглавесѳг. Евге-

ний Платонов лѧвыс: «Тыхѧтал ам яныг пўмѧщипѧ лѧтың мѧ-вит ос ўйхул ўргалан мѧхмытын лѧвѧгум. Тѧн тѧрвитың рўпатаныл мѧгсыл мѧн иң сѧвсыр мѧрсың ўйхул кѧсалаңкв вѧрмѧв. Та мѧхмытын мѧн нѧвѧраманув яныг пўмѧщипѧ лѧвуңкв иң патѧгыт».

Тувыл ѳлаль Сергей Пикунѧ лѧвыс: «Ам ос ты йильпи «ВЫГЫР НѧПАК» щѧпитан мѧхмытын лѧвѧгум. Тѧн ты мѧгсыл сѧв рўпѧтѧ

вѧрѧгыт. Вѧрум рўпатаныл щирыл анѧ ос мѧ-вит ос ўйхул ўргалан мѧхмытын кўстырнувѧг рўпитѧңкв паты. Мѧн-тинѧнувн мѧв сыстамыг ос ўйхуланув сѧлитым щирыл ѳнѧщуңкв ѳри. Акван-нѧтхатым анѧ ѳлнѧ осың «ВЫГЫР НѧПАКУВ» уш тах вѧвтами».

Округувт шар ѳвыл тамле нѧпак 1999 тѧлт тѧратавес. Нѧпак щѧпитан мѧгсыл тит хѧтпаг рўпитасѳг. Тыи Виктор Андреевич Галинки, тав анѧ мѧ-вит ўргалан госудѧрственный инспекторы рўпиты. Тувыл Антонина Федоровна Тарханѧва, тѧвокругянытыл ѳлнѧ экологический фонд тармыл председателиг ѳлы. Тѧн ты тит ѳмас, анѧ ты нѧпак щѧпитан кастыл сѧвыңпѧлѧ потырт атсѳг. Антонина Федоровна «Заслуженный эколог Российской Федерации» нам ѳнѧщи.

Ўйхул ўргалан урыл хўрум доклад ѳлыс. Лѧвинѧтам нѧпаканыл пуссын мѧ-вит ўргалан мѧт рўпитан мѧхмытын щѧпитѧлвѧсыт. Потраныл халт тѧн лѧвсыт: «Ўйхуланув, сѧвсыр хѧрамың лўп-

танув ос лѧхсанув хуль-туптан мѧгсыл мѧнавн тѧн ѳлнѧ ос яныгман мѧнаныл сыстамыг ѳнѧщуңкв ѳрѧгыт. Мѧн округувт тамле мѧ мощщѧ. Таимѧгсыл мѧн анѧ ты ѳлаль номсахтѧв, хоты мѧт ўргѧлаңкв ѳрѧгыт.

Округув янытыл тамле хурип нила мѧ вѧрѧв. Акватѧ Нѧранув ляпат, тувыл хѧталув нѧглын ѳрт тит мѧ вѧруңкв ѳри. Та коныпал ос тит мѧ Лордовский ос Бѧзуковский нампа мѧ-вит ўргалан мѧнѧ мѧг яныг щѧ-питѧңкв номсѧв. Ёрнѧ нѧпаканыл щѧпитѧңкв ѳрѧгыт. Ты мѧгсыл мѧтахтем тѧл ѳри. Шар мѧксѧв ѳмас сыстам мѧт Нѧр нупыл ѳлѧгыт. Тот мѧ-витѧ шар мѧксѧв сыстамыг хультуптаңкв ты ѳри.

Яныгман мирув мѧнѧ тѧгыл мѧ-витув сыстамыг ѳнѧщуңкв ос ўргѧлаңкв вос хѧнѧщувлѧгыт. Тѧнт ты ѳлнѧ мѧв хѧсан сыстамыг хульты».

Тув ѳхтѧлам мир пуссын ты йильпи «ВЫГЫР НѧПАКЫЛ» мўй-луптавесѳв. Тав, сѧль, матыр тѧра-паттын мѧгсыл ѳмас нѧпакыг тѧлыс.

Александр ВЬЮТКИН



Алнхул, ты хўл «ВЫГЫР НѧПАК» хансым ѳлы

МĀ-ВИТ ЫРГАЛАН ВĀРМАЛЬ

Мā-вит ырґалан тѐла ѐлаль тотаве

Яңк нāтнѐ ѐтпос 23 хōталныл Юґра яны-тыл «Спасити и сохраниѐ» нампa акция рӯпитанґке ѓвылтахтас. Ань тыт сāвсыр ханищтапыт, касылыт, фестивалит, конференцият вāрвѐсыт. Мāхум ййвыт ѓнттѐгыт, порс акван-атѐгыт ос сāв мōт ѐрнѐ тѐлат вāрѐгыт.

Сергей Пикунов, мā-вит ырґалан службат кӯщай хум, лāвыс, тамле рӯпатаныл хосыт тāн мāхум мā-вит янытлаңке, ырґалаңке ханищтыяныл. Округут мā-вōй нōх-винѐ мāхум рӯпитѐгыт, тāн сāв тāl сыс мā-витув пāңктысаныл. Тамле акция хосыт тāн нефтяникыт мā-вит янытлаңке, систамтаңке ѓс ханищ-

тыяныл. Тāн ань мā-вōй мори ат сōсантѐгыт, вōр нас тох ат сāгрѐгыт, тот сāвсыр пѐс пӯщкат ос пѐс кѐр-ломтыт хōт-āти ат пāхвтѐгыт.

Акция рӯпитанґке ѓвылтахтам порат Ханты-Мансийск ѓст акв конференция рӯпитас. Тув округ янытыл нāврамыт ханищтан хōтпат вōвиньтālвѐсыт. Тāн «Экология безопас-



ности жизнедеятельности» нампa предмет урыл тот потыртасыт. Ань ѓсувт тōва школат нāврамыт ты предметын ханищтаңке тах патавет. Тувыл мōт школатыт ѓс акв тамле урок тах вāраве. Ханищтап департаментыт рӯпитан нѐ Антонина Ырсу-Архипова лāвнѐтѐ ширыл, тох тāн нāврамыт мāньтāгыл мā-вит ырґалаңке ханищтыяныл.

Акция ѓвылтан кастыл Ханты-Мансийск ѓст ялпың хōтал ѓлыс. Ыскант аквторыг 22 сāвсыр суссылтап рӯпитас. Кāсың хōтпа тавѐн пӯмаш тѐла хōнтуңке тот вѐрмыс. Акв мāt нāврамыт кāтыл хурит пōслысыт, мōт мāt ѓйхулыт суссылтавѐсыт, хӯрмит мāt ос тѐпкан ѓнттын хорамың лӯпатат ты налавѐсыт. «Лылың сōюм» студият рӯпитан хōтпат āкань вāруңке āгирищит-пыгрищит ханищтасаныл. Мāньлат мāхум «Макулатура, сдавайся» нампa акция вāрыгласыт. Кāсың элумхōлас тув ат ѐрнѐ ловиньтан пѐс нѐпакыт миңке вѐрмыс. Ты акция нилахуйплов хōтал рӯпитас, ты пора сыс ѓст ѓлнѐ мāхум 9 арыгкем тонна пѐс нѐпак тув тотсыт.

Мāхум янытлаңке Геннадий Бухтин, губернатор вāнын хум, ѐхталас. Тав лāвыс, мāхум мā-вит ырґалан вāрмаль урыл потыртаңке сāвсыр мāныл тыг ѐхталѐгыт, ты мāгсыл ты акция мā янытыл ань вāве.

Кāсың тāl «Обь-Иртышский бассейн: молодѐжь изучает и сохраняет природное и культурное наследие в регионах великих рек» нампa конференция вāрыглаве. Ты тāl мāньлат мāхум яңк нāтнѐ ѐтпос 25-29 хōталытт акван-атхатыгласыт ос вāрнѐ рӯпатаныл урыл тот потыртасыт.

Лӯпта ѐтпост лāххал тотнѐ хōтпат мāгсыл ос «Спасити и сохраниѐ» нампa касыл рӯпитас. Ты касыл «Югория» нампa телекомпания щѐпитāлыглы. Мāхум мā-вит ырґалан вāрмаль урыл пōслум кинаныл тув кѐтыгласыт. Ты тāl онтоловхуйпловит фестивалыныл ѓлыс.

Акция лӯпта ѐтпос 20 хōталѐ мус рӯпитанґке тах паты, ты пора сыс округут мā-вит ырґалан мāгсыл 400 сāвсыр рӯпата тах вāраве.

Людмила ТЕТКИНА



ХАНИЩАП

Латһув ул вос ёрувлылүв

Яңк нәтнә этпос хусыт хөталәт Ханты-Мансийск үст соссан мир Өлүпсав ос щән ләтһагув урыл заседания Өлыс. Мәхум акван-атхатыглан мәт щар яныг кўшаиг губерна-тор вәнын хум Геннадий Бухтин ос Ассамблея кўщай Еремей Айпин Өлсҫыг.

Заседаният округув сәвсыр мәныл ёхта-лам кўшаиг Өлнә мәхум тәнти вәрум рүпатаныл урыл докладыт ловинь-тасыт. Щар Өвләт Ирина Лисютина докла-дә ловиньтастә. Тав соссан мәнылат мәхум ётрүпитан Департамент колт кўшаиг Өлы. Тав ханты ос мәныщи мәхум хөт ханищтаһгыт, та потре урыл Өлыс: «Ты тәл округув янытыл сәт сөтыра 896 соссан әги-пыг сәвсыр мәтт ха-нищтаһты. Мәк сәв ма-хум Хәльүс районныл Өлы. Тувыл акв сөтыра 506 нәврам 39 сәвсыр мәтт ханищтаһгыт. Та юи-пәлт Хан-

ты-Мансийск үс, тот акв сөтыра 139 хөтпа 29 мәтт ханищтаһ-тәгыт. Кондинский рай-онт 895 ханты, мәныщи нәврам 33 школатыт ханищтаһтәгыт. Тувыл Өлалә Нижневартон-ский, Белоярский ос Сургутский районныт халт сәв соссан нәврам ханищтаһты.

Кәсың йильпи тәлт соссан мир ләтһыл по-тыртан мәхум мощща-ми. Лов тәл ювле хуль-тум порат яныг үсың мән ёхтум ханты манос мәныщи нәврам тәнти ләтһанылт потырта-сыт, ат те потыртасыт, сакати торгамтасыт. Ань щән ләтың вәнә



нәврам сака мощща. Мән нәврамыт ханищ-тан Департамент колт ты урыл сәв номсахтәв.

Округувт акв сөтыра 694 школатт нәврамыт тәнти ләтһаныл ха-нищтәгыт. Ханты нәв-рамыт халт акв сөтыра 138 нәврам хўс ханищ-таһтын колытт ләтһа-ныл ханищтәгыт. 436 нәврам нё-лолов колт мәныщи ләтың ханищты-яныл. Мөлтә соссан нәврамыт оманыл, әтяныл ханищтан урыл титыгласанүв. Тән ха-ланылт ёмас сәвиттем мир тәнти нәвраманыл щән ләтһаныл ха-нищтаңкв ат кә-сәщәгыт. Та урыл тән ләвәгыт: «Манрыг наскәссыг нәвраманув саватаңкв, вәти манос хоса хультыс, ләтһув тох та мины».

Округувт ханты ос мәныщи ләтың ханищ-тан мәхум сәвыңпәлә средний специальньй образование Өнщәгыт. Таимәгсыл мән сәвсыр ханищтап, тән хала-нылт каснә курсыт вәрыгләв. Округ касы-лыт нөх-патнә мәхум ос Россия мә яны-тыл ләтһыт ханищтан мәхум халт касуңквә тәтыглыанүв».

Хәльүс районт нәв-рамыт ханищтан щи-рыл кўшаиг рүпитан нә Наталья Прожога тәнти вәрум рүпатаныл урыл

потыртас: «Мән Хәльүс районувт соссан мир ләтың ханищтан сәт кол Өлы. Тотнила сөтыра 989 нәврам ханищ-таһты. Тән халанылт акв сөтыра 506 соссан нәврам ләтһаныл ха-нищтәгыт. Сәвыңпәлә тот мәныщи ләтһыл потыртан мир Өлы. Саранпәвыл школат нәврамыт сәран ләтың, Тәк пәвылт ос ханты ләтың ханищтәгыт.

2012 тәлныл округувт «Языковое гнездо» нампә проект вәрим Өлы. Мән районувт мәныщи ләтың ханищ-тан хўрум садик Өлы. Тән Саранпәвылт, Куль-паст ос Няхшамвөль пәвлытт рүпитәгыт. Тув 65 нәврам ләтың ханищтаңквә яланты.

Кәсың тув нәврамыт үщлахтын «Мань уск-ве» ос «Сорни сәй» тит ёмас мәг рүпитәг. Тот тән мәныщи мир Өлүпсаныл ос ләтһаныл ханищтәгыт. Ты мәг мәнавн яныг нәтмил вәрәг. Мәныщи ләтың ханищтан хөтпа ат төвылхаты. Мәнылат мәхум үсың мәт Өл-нәныл юи-пәлт пәвлың мән вәнтлуңкв ат кәсәщәгыт».

Ты кўшаиг юи-пәлт Әс мәхманув тәнти вәрыглан наканыл урыл потыртасыт.

**Александр
ВЬЮТКИН**



А. С. Сопочина

Сав тал нйврамыт ёт рупитан нэ

Урай үст ам кәркам, потрың мәнйши нэ ёт вайхатыгласум. Тав наме Тамара Ивановна Голованова, такви ағи өпарище наме щирыл Тайлакова.

Тамара Ивановна щашёкватэ, өпатэ пёс тағыл Тап нампа мәнй павылт олсыг. Та павланыл Конда ос Тап яг акван-патнэ мат олыс. Конда я вата хосыт олнэ пёс павлыт пуссын акв я вата хосыт үнлэгыт, туп Тап павланыл тапал ватат олыс.

Тамара Ивановна 1952 талт тал котилэ этпост Тап павылт самын патыс. Аятэ наме Иван Александрович олыс. Колхозаныл яныг олме порат тув палыт үйхул тэнэ кастыл пум вәрнэ, хул алышлан хумыг рупитас. Тэлы найив сәгрыс ос вораяс.

Оматэ наме Дарья Васильевна, тав ос мис поснэ нэг рупитас.

Өпатэ наме Александр, яныг хонт порат тав Ленинград, ань Санкт-Петербург үс, пөхат порслувес. Щашёкватэн похоронка нампа нэпакыл атпыл тотыглавес. Война юи-палт рутананыл юи-овыл пишмат ёхталан мән сав пишма тётыглалсыт. Тувыл ювле пишмал ёхталавёсыт, тот хансым олыс: «Александр Георгиевич хот порслувес, ат ваве, тав наме нэмхот атим. Эрың мән ётув хонтлан махум палт минос».

Тамара Ивановна мощ ётылнуве тарапаттыстэ. Хонт астын юи-палт сав мир тамле хурип пишмал ёхтыглавёсыт. Опатэ Александр Георгиевич войнан минос.

порат щашёкватэ Наталья Семёновна ат мәнй нйвраманэ ёт хультыс. Халанылт тит ағи, хурум пыг яныгмасыт. Нйвраманэ тыттын магсыл Наталья Семёновна сав рупитас. Пыганэ мощ яныгнувёг ёмтманыл юи-палт уш кустырнувёг олункв патыс.

Тамара аятятэн потырталвес, хумус тав оматэ хул пувим, найив сәгрим ос пум вәрим этэ-хоталэ рупитас. Юв мощшаквен ёхтамы, нйвраманэ тыттыянэ, тувыл рупитаңкв ос та мины. Щашёкватэ тав ос ёмшакв номитэ, тох лавыс: «Сав рупитаме магсыл тав такви таланэн ат сусхатас. Тав матумнувёг олыс».

Тамара Ивановна самын патум Тап павлётнила класс мус хаништахтас. Тувыл Леуши павылн интернатын элалы хаништахтуңкв тётвес. Каникулытт ушлахтын хоталыт порат аятятэн аквписыг юв тотыглавес. Леуши павылт иңнила тал хаништахтас. Нёлолов класс асламе юи-палт Ханты-Мансийск үсн нйврамыт хаништан нэг хаништахтуңкв минос. Та юи-палт Тобольский институтн «Физико-математический» факультетн хаништахтуңкв минос. Тот хурмит курс асламе юи-палт ойкаңыг ёмтыс. Тувыл тара Урай үсн ювле та вантлыс.



Т.И. Голованова ёмаспал нупыл-пёслым олы

Ань олнэ үсн ёхтуме порат өвлёт тав ат тал нйврамыт хаништас. Тувыл садик колн воспитателиг патхатас. Тот тав пенсиян миннётэ мус рупитас. Ань тав лавыс: «Урай үс олнэ товамәхумётмәнйтағыл вайхатёгум. Хунь хот кәсалавем, ханьшавем, аквписыг пащалахтэгыт. Тән лавум акв «Паша» ләтңыл, ам сымум аквтупмат та кәмнями».

Тән ойкатэнтыл тит пыг янмалтасыг. Пыгаге сас щёмыяңыг, Урай үст өлэг, омагён-агыгён акваг нётэг. Тамара Ивановна щашёкватэ олме порат мәнйши ләтңув потыртантем торгамтастэ кос. Та пасныл хосаг ёмтыс,

ләтңув хот-ёрувластэ. Пенсиян квәлме юи-палт нас тох ат олы. Яныгпалаг олнэ мәнйши хотпат ёт кәсың сатыт хоталт акванатхатыглэгыт. Тән акванатхатыглан вәрмаяныл «Возрождение» намаясаныл. Тән тот аканит юнтэгыт, сакныл мәнйши хорам хартуңкв хаништахтэгыт, мәнйши ләтың хаништэгыт ос мәнйши эргыт эргэгыт.

Урай үст олнэ ёмас колтагыт сав сөт вос оныщёгыт, нйвраманыл пустагыт вос өлэгыт! Танти Най-Отранылыл вос үргалавет!

**Александр
АНИЯМОВ**

СОССАҢ МИР ӨЛУПСА

Мән акв мәнщи
нэквев сти-
хыт хаснэтэ магыс
мирн вәңкв пат-
вес, тав наме Свет-
лана Селивѣрстов-
на Динисламова, ағи
опарищ наме Садо-
мина. Тав ань так-
ви Тагт павлэ ну-
пыл ялыс, тот павлын
мир ёт хонтхатыглас.
Мён тав ётэ ты урыл
потыртасмён, тав по-
тре ловиньтэлын.



– Наң наңти павлын
тұяг ялсын. Газетав
магыс потыртэн, ма-
ныртот вәрсын? Хотьют
ёт тот хонтхатыгласын?

– Тот ам Тагт
павылт өлнэ мир ёт
хонтхатыгласум. Мән
клубт, ёнгынколтакван-
атхатыгласув. Любовь
Зорина тав ты вәрмал
вәруңкве номылматас,
анумн тыг Ханты-Ман-
сийск үсн свонитас, мён
потыртахтасмён, тув
таймагыс ты ялсум.

– Наң ётын хонт-
хатыглан магыс сав
хотпа ёхталас?

– Клубт сака сав
мир ат ылыс, ватахтем
хотпа. Анумн тән ёта-
ныл потрамаңкве сака
пумыщ ылыс, тананылн
стиханум ловиньтаса-
нум.

– Павлын махманын
наң стиханын хумус
хунтлысаныл? Маныр
тананылн потыртасын?

– Тагт павылт өлнэ
хотпатн, ам номсэгум,
пумыщ хунтлаңкве ылыс.
Ам тананылн сартын
мәнщи мир урыл ос
мәнщи латың урыл
потыртасум. Тамле по-
трыт касың хотпан сы-
мын шалтэгыт. Пёс по-
рат, хунь руш махманув
тыг иңыт ёхтысыт, тонт
мән мирув сака ёмашакв
ылыс.

Атсат тал миам по-
рат мәнщи мир сака

Мирув янытлан нэкве

ёр мирыг ылыс, сав
вәрмал тонт вәруңкве
хасыс. Ань лавёгыт –
мән туп вораяңкве ос
хул алышлаңкве хасэв.
Вәим, ты сака эрнэ
вәрмал, тьи тал мирув
олуңкве ат вәрми, хосат
тагыт тох мирув ылыс.
Ос ты коньпал тав иң
сав вәрмал вас.

Тонт, пёс порат,
мәнщи хотпат нянь
янмалтаңкве хассыт,
кёр толтуңкве ос та
кёрныл савсыр порма-
сыт вәруңкве, тына-
лахтын вәрмал ылыс,
савсыр элы-сам мән
ялантәлсыт – яныг яр-
маркытн, тот вьгыр сов
уйт, сэмыл сов уйт мот
пормасытн пентсәлсыт.
Тонт мәнщи хотпан
вәрмал ос сака ёма-
шакв васыт.

Нёр тыпал ёрн мәнщи
мир өлнэ мән нәмхотпа
хоса талыт миннэныл
сыс ёхтуңкве ат вәрмыс,
сака няңраг хотлам
кәнашит ос тән аяң-хум-
пыганыл олсыт. Ты урыл
ам Тагт павыл мирн по-
тыртасум, тувыл стиха-
нум ловиньтасанум.

– Павлын мирн,
рутанын матыр латың
газетав тара тетэгын?

– Тагт павылт өлнэ
хотпатн сав ёмас латың
ләвуңкве таңхегум. Тән

элал ос тамле сымың
хотпаг вос олэгыт, ёмас
рүпата вос оныщэгыт,
щәмьянылт пуссын
пустәгыт вос олэгыт,
нявраманыл элал вос
хаништахтэгыт. Ань
өлнэ касың хотпан сав
мүтра вәңкве эри, сав
мүтра хаништаңкве,
тонт тах олупсаныл
күпнитнувэг паты.

Ань өлнэ йис ха-
ништап тал рүпата
хонтуңкве тәрвитуңыг
патыс. Няврамыт,
хаништахтән, пүмща-
лахтән, алам пёс йис
порат олум нән яныг
щашёкванын-опанын,
анёкванын-ащойка-
нын сака сав васыт.

Тән сака сав номтың-
мүтраң потрыт, мөйтыт
хультуптасыт, матъёмас
ты потрыт венгр ос финн
учёныитн яныгсәт ат-
пан тал арыгтем пәсныл
ёл-хансыгләлвёсыт.
Тыхотал ты потрыт
ловиньтым, самвита-
нун нәглэгыт – яныг
номт, яныг мүтра тән
та вамыт. Акв стихум
ловиньтэлын.

"Витсам"

Амти мам нэ –
латың тал ат олэгум,
Нотум палытэт щань
латнум улылэгум,
Номтум вөйт овим
потранум лавиянум,

Сымум вөйт хуим
потранум тотыанум.

Тагт я сыстам витквет
витсамыг овёгум,
Сульгин яңкыт халт
яңксамыг вольгёгум,
Сосхатнэ раквыт ёт
раквсамыг патёгум,
Ёнхамлан түйт ёт
түйтсамыг ёнхёгум.

Йисыт миннэныл сыс
сав щёс ылыгләлмум,
Щаньтем сәнсагёт сав
щёс үнлыгләлмум,
Овың я витсамыг
аквнакт хунь овсум,
Мәнщи мирум халт
аквнакт хунь олсум.

Касың вөр лөхьясыт
ләглум ёмасәлум,
Элал миннэ лөңх
номттем хонтсәлум.
Төрүм ма-вит эрге
ам та хунтамләлмум,
Щаньтем эргум эрге
ам та эргалтамлум.

Суиңыщ ман суйтәл
эргум ылытаслум,
Самвит сэгумтәлым
кәсум оссувласлум,
Өлнэ хосытумтыл вос
витсамыг хультэгум,
Миртем эргыт-потрыт
ул вос ёрувлэгум.

С. Динисламова ёт
В. ХОЗУМОВА
потыртас

Хонтаң маньщит нэпакыт ловиньтаңкве эруптэгыт

Та этпос оигпам элы-пэлт 27 щислат библиотекат янытлан хоталыг олыс. Мән округувт яныг ұсыт манос мән павылквет 237 нэпак ловиньтан кол олы. Акв тамле библиотека Кондинский район Леуши павылт рүпиты.

Татьяна Александровна Нохова, ты библиотекат рүпитан нэ, лавыс: «Леуши павылт нэпак ловиньтан кол 60 арыгкем тал олы. Ам яныгпала хотпат эт хонтхатыгласум, ты вәрмал урыл китыгласанум. Александра Кузьмовна Питухина, мәнщи эква, таи а́нум лавыс, Леуши павылт о́лнэ пупколт нэпак ловиньтан кол рүпитас, руш латңыл «изба читальня» намаим олыс. Тав лавме щирыл, мән павлуvt библиотека 90 арыгкем тал рүпиты.

Ань 530 э́лумхóлас библиотекан хасхатим о́лэгыт, т́ан халанылт 210 – няврамыт. М́ахманув тыг вос э́хталасыт ос нэпакыт вос ловиньтасыт, ам акваг савсыр суссылтапыт, ялпың хоталыт в́арыглэ́гум. П́авлуvt коррекционный школа рүпиты. Няврамыт тыг район янытыл ханищтахтуңкве ќетавет. Т́ан м́агсыланыл ам суссылтап о́с щ́епиталэ́гум. Акв порат савсыр п́ес а́нысаныт, м́аньщи п́айпыт, с́овтыт ос м́от утыт тыт суссылтасанум. Няврамаквет ты выставкал сака п́умщалахтасыт. Ань т́ан в́атихал тыг э́хталалэ́гыт.

П́авлың няврамыт нэпакыт вос ловиньтасыт, т́ан м́агсыланыл

о́с савсыр п́умаш в́арыглэ́гум, савсыр касылыт щ́епиталэ́гум. Ловиньтан нэпак хосыт савсыр л́атың китыглэ́гум, та няврамыт хотьют савнуv в́аг, м́уйлупсал м́уйлуптыанум. Ќасың т́ал м́аньполь этпос «Неделя детской книги» нампа ялпың хоталыт в́арыглэ́гум. Туи порат нэпакыт библиотекат виңкве ул вос ёрувласыт ос яныг программа щ́епиталэ́гум. Яныг хотпанув тыг в́овыглаңкве ат э́ри, т́ан тай нэпакыт ловиньтаңкве ќасщ́егыт.

Х́урум т́ал «Центр общественного доступа» тыт рүпиты. М́ахум интернет щ́ирыл рүпитаңкве библиотекат в́ермэ́гыт. П́авлуvt ты ут сака л́юльсаң рүпиты, тыи м́агсыл м́аньлат м́ахманув акваг тыг э́хталэ́гыт. Яныгпала хотпанув компьютерыл рүпитаңкве о́с ханищтахтыануv. Тамле ханищтап м́ан х́урум щ́ес в́арыгласуv. Това яныгпала хотпат ты утыл рүпитаңкве молях ханищтахтасыт, т́оват щ́ар ат в́ермысыт, аква хотал э́хталасыт, тувыл сысы та минасыт. М́ан библиотекат туп 18 с́отыра арыгкем нэпак о́ныщэв. Тыи м́агсыл ты компьютер сака э́ри,



интернет хосыт савсыр нэпак хонтуңкве ос ловиньтаңкве р́ови.

Соссаң м́ахум п́ес йис в́армаляныл ос щ́ань л́атңаныл урыл хансым нэпак тыт сака мощща. М́аньщи ос ханты писателит хансум нэпаканыл тай о́ныщэв. М́олты т́ал Юрий Вэлла, стихыт хансум ё́рнхум, а́тимыг ё́мтыс. Тав нэпаканэ ам акваг-атыгласанум ос суссылтап в́арыгласум. М́ахманув ты суссылтап ќасалым, нэпаканэ ловиньтаңкве вуйлалсаныл. Еремей Айпин потранэ о́с тыт о́лэгыт, тав нэпаканэ м́ахум ловиньтаңкве сака э́руптэ́гыт. Андрей Тарханов хансум

нэпаканэ ос пуссын тыт акваг-атсанум. М́аньщи о́йка тыт самын патыс, тыт яныгмас, школат тыт астластэ. Ё́мас о́лнуv, Андрей Семёнович яныгмам п́авылн ке э́хталанув, м́ахманэ эт в́ащиньтахтанув, т́ананылн такви нэпаканэ урыл потыртас ос стиханэ ловиньтас.

Татьяна Александровна библиотекат 18 тал рүпиты. Нэпакыт ловиньтаңкве такви э́рупты, тыи м́агсыл рүпататэ ё́машакв в́аритэ, м́ахманэ нэпак ловиньтаңкве ханищтыанэ.

Людмила АЛГАДЬЕВА

Салың махманув хөнтлын накт нётсыт

Яныг хөнтлын накт соссан махманув хумус хөнтлысыт, ты урыл мощца потыр олы. Төнт савыңпәлэ лүимәт олум хөтпат писалил пөсын ёмшакв хөйнэныл магыс снайперыг вуйлувёсыт. «Новости Югры» нампга газетат ляххал тотнэ нэ Наталья Анадеева ты вәрмалъ щирыл потыр кинсыс. Насати, хөнтлум накт соссан махманув салың суныл яныг нётмил вәрсыт. Тән Ленинград үс блокада олум порат тәнүт, пормас тув тотыгласыт.

1941 тәлт яныг таквс этпос Государственный Комитет Оборонны СССР приказ щирыл салың суныл яласан хөтпат акванатуңкве патвёсыт. Соссан хөтпат Ямало-Ненецкий округныл ос Коми республиканыл атвёсыт.

Төнт ты саран, ёрн ос саам махманув салың тагыл хөнтлуңкве вуйвёсыт. Тән халанылн акв мәнщи хөтпа Семён Сайнахов тув ликмыс. Ты мәнщи ойка Хальүс район Анъя павылт самын патыс, тот яныг-

мас. Ты Тамара Семёновна Мезенцева тав атятэ олыс. Тамара Семёновна ань Ягрим павылт олы. Тав ты урыл ляххал тотнэ нэн Наталья Анадееван тох потыртас:

«Ам ашум Семён Кириллович, омам ос Анастасия Степановна Сайнаховыг олсыг. Ашум омам Люлюкары павылныл тұлмантастэ. Экваг-ойкаг акваг Анъя павылт олсыг. Тән война овылтахан мус ат ныврам ошсыг, война холам юи-пәлт ос ат ныврам самын



Сайнахов Экваг-ойкаг

паттысыг. Пуссын аквёет лов ныврам янмалтасыг.

Хөнтлын накт овылтахан порат ашум тара войнан вуйвес. Омам нывраманэ янмалтасанэ ос колхозт савсыр тәрвитуң рүпата вәрыс. Төнт ныврамыт, нэт ос яныгпала хөтпат тәнкинәныл салиттәл рүпитасыт. Павлың махум пуссын аквёет тўя пәсныл яңк пөлынэ мус няр ләглыл пөлям

витыт сусым хұл алышласыт. Тэлы порат пувум хұланыл лувың суныл Ханты-Мансийск үсн тотыгласаныл. Ты хұланыл магыс тән сыртэпыл, коласыл ос саккарыл майлувёсыт.

Атам аще (ам опам) Кирилл Васильевич наме олыс. Тав сав пыг онышис. Мән пыганэ пуссын Хальүс пупкол школан хаништахтуңкве майлысанэ. Ныврамыт халт ашум шар янгыг олыс, таимәгыс тав щәнягән-ащәгән хаништахтуңкве ат майвес, юн савсыр рүпата вәрим олыс. Школан ат ялантаме магыс руш латың шар ат вәс. Хөнтлам мат ушца руш латың вәңкве патыс».

Щёман ойка Ленинград үс вуянтас ос Курский дугат хөнтлыс. Махманув тот сака тақыщ алышлахтасыт. Аквматнакт тав китыглавес: салың суныл яласаңкве хасы манос ати. Тав вәим, хасыс, аще салың хумыг олыс. Ты потыр юи-пәлт тав салың суныл майвес ос Ладожское нампга түр ұлтта Карелия мәныл блокадный Ленин-



Ты пёс хурит Ас махум пөслым блэгыт

град ѱсн тѣнут-пормас тотыглаҥкве кѣтвес. Та порат Ленинград ѱст ѳлум мѣхум тѣтал сѣваласыт. Фашистыт ѱс мѣвылтасаныл, тѳнт тот сѣв мир тѣтал порсыс. Щѣман ѳйка тув тѣнут хартыс, ювле ос нѣврамыт сунын тѣлттым тотсанѳ.

«Новости Югры» руш газетат рѣпитан мѣныщи ѳги Наталья Анадеева ты вѣрмалъ щирыл ѳлалъ кисхатуҥкве патыс. Интернетыт Щѣман Сайнахов урыл хоты потрыт ѳлсыт, пуссын ловиньтасанѳ. Аквматѳрт тамле потыр хѳнтыс: «Приказ 253 стрелковому полку 45 стрелковой дивизии Карельского фронта 1 июля 1944 года». Ты потыр щирыл 1942 тѣлт яныгпѳль ѳтпост 28 хѳталт Сайнахов Семѳн Кириллович «За отвагу» нампа мѣгыл пѳсыл майвес.

Ленинградский фронтыт тамле вѣрмалъ ѳлыс, Пушкин ѱс винѳ порат, немцыт сѣв патроныҥ писалил сѣлтатанув пѣтлуптасаныл, ѳлалъ ат тѣртсаныл, тѣкыщ юв ѳртхатыгласыт. Щѣман ѳйка командирын та писалъ лаппѳилттаҥкве кѣтвес. Тув лаквмѳтѳ нѣлын хѳйвес ос кѣркам

мѣныщи хѳтпакве тув граната вушкасаҥкве ѳлымас, ты хосыт пулемѳт хот-поилттаҥкве вѣрмыстѳ. Та юи-пѣлт тав мѣхманѳн тѣра пѣльниѳан тотвес. Китынтыг ос Сталинград ѱс вуянтым нѣлын тѣкыщ сакватѣлвес. Пѣльниѳат пусмалтавес, ос ѳлалъ лусытаҥкве минас.

Лѣххал тотнѳ нѳ ты нѳпак ѳлалъ ловиньтматѳ, хот-ѳщатахтас. Насати, тав осетиныг хансым ѳлы. Осетиныт - малтып мѣт ѳлнѳ мѣхум тох лѣвавет. Ты тѣла щирыл тав округ военкоматын звонитас, тѣн лѣвсыт: «Тамле нам акв хѳтпа ѳныщис. Тав Хѣльѳс район ѳнѳя пѣвылныл ѳлыс». Тѣн лѣвнѳныл, анѳ таимѣгыс тох ѳмтыс, Щѣман ѳйка руш лѣтҥыл потыртаҥкве ат хѣсыс, остякыг улпыл лѣвхатас кос, ос мѳт щирыл торгамтавес. Осетин мѣхум мирн ѳмщакв вѣвет, ул таимѣгыс тав та мѣхум нупыл ты хасвес.

Тамара Семѳновна 1952 тѣлт самын патыс. ѳще хѳнтлум нак урыл сака сѣв ат потыртѣлыс, тѳва потрыт пуссын ѳмщакв номиянѳ. Щѣман ѳйка потре щирыл, аквматнакт тѣн Карелия мѣт ѳнылыс. Кон



Т. С. Мезенцева ѳмаспалнупыл ѳнлахѳлы

татем ащирманѳ ос сѳҥкв ѳлыс. Сустѳнт, ѳгириш торыл пантхатым лѣли. Тав палтѳ ѳмыс, китыглахты, ат пѳляве. Вильтѳн ѳҥкватас, насати ѳква лѣли, тав тох лѣвыс: «Пыгкве, наҥ хѳнтлѳн, хѳнтлѳн, ам ат пѳлявем».

Курский дугат хѳнтлум вѣрмалъ ѳс номыл матыглѣлыстѳ. Акв хотты накт тѣрвитыҥ хѳнт юи-пѣлт щар суйтѣлыг ѳмтыс. Щѣман ѳйка писалиҥ тѣгыл траншеял нѳхворатас, ѳҥкватас, тав ѳлы-палѳт мощ ѳлыннѳв немец ѳйка писалиҥ тѣгыл лѣли. Сас тув кѣртсыг, акв лѣлыт нас та сунсѳг. Тувыл немец илттыг мѣн ѳл-ѳнтылматас. Щѣман ѳйка ѳс ювле порыгмас, писале уральтастѳ, насати нѣл тѣл ѳлыс. Тамле ты нак ѳлыглас.

ѳтылнув хѳнтлын нак пѳйтыс. Щѣман ѳйка ѳнѳя пѣвылн юв ѳхтыс. Тот тав колхозт вѳраим ос хѣл алыщлым рѣпитаҥкве патыс. Тав хѳнтлум нак урыл ѳргыглам ѳргыт сака ѳруптасанѳ, вѣтихал ѳргысанѳ. ѳйка пѳс ѳйс ѳлупсат ѳмщакв вѣсанѳ. 1959 тѣлт тав пѣвылт ѳй ѳйквнѳ вѣрмалъ вѣрыглас. Та

ялпыҥ хѳтал юи-пѣлт тав мирколн сѣпранин вѳввес, партбилетѳ пасанын пинуҥкве лѣввес. Тав хот ат рѳхтыс, тох лѣвыс: «ѳм ты партбилетум кѣлп хосыт сѣлыслум. Нѣн ос хѳнтлын мѣт ѳлсѳн-а?» Ос тав нѣвраманѳ мѣгыс сака пилыс, тѣнтѳеныл ул вос хулытсыт, таимѣгыс партбилетѳ пѣсанын пиныстѳ ос сысы та минас.

Семѳн Кириллович 78 тѣл ѳлыс. Нѣлын сакватѣлум мѣнанѳ акваг лоҥхитавѣсыт. Тамара Семѳновна таве акваг пусмалтастѳ. ѳтыл ѳще тав нупылѳ тох лѣвыс: «ѳгикве, лѣккарыг хаништахтѳн, наҥ кѣтагын татем кѣпнитыг».

Тамара Семѳновна лѣккарыг ат ѳмтыс, ѳлнѳ пѣлытыл клуб колт акваг рѣпитас. Тав хунѳ воина урыл кина сунсы, акваг ѳще номылматыглѣлытѳ, аквтупмат таве тот кѣсалытѳ, тав потыртѣлум потранѳ ос кинат щар аквхурипат.

**Ты потыр
Наталья Анадеева
хансытѳ, мѣныщи лѣтҥыг
Николай МЕРОВ
толмашластѳ.**



Тұлыглапыт хурин пöслысанэ

**Музеит янытлан хөталт махум
мұшлахтын мағыс савсыр колытытн
вöвиньтальвёсыт. Тән пуссын оln ойтнэ
тәл тув щалтсасыт, ос маныр вәрмалит тот
өлэгыт, мұсхалыг пұмшалаңкве вөрмысыт.**

Г.С. Райшев, кәтыл хурит пöслын ойка, галерея-мастерской колэт сав ныврамыт щань-ащаныл ёт атхатыгласыт. Тот «Музейная ночь с маэстро-2014» намба программа щёпитальвес. Кон кол ависунт пöхат мүй махум Олег Боровков үрсанэ, тав саксофоныл нётнэ эрыгсов таныт ёнгыс.

Тувыл Геннадий Райшев мүй махум ёт пащалахтас ос тананыл өвлэт кон матыр пöслуңкве лавсанэ, ётыл юв суссылтапыт сунсыглаңкве вöвсанэ. Музей кант яныг осың төрыт нортвёсыт ос савсыр ахвтасыт ләккв-пиным олсыт. Ныврамыт щань-ащаныл ёт тув ёмантасыт ос кисточка кәтн вуим ахвтасыт савсыр ольпыл сартсаныл ос мувлахи төр тармыл хурит пöслысыт. Тананыл «Югорская легенда» яныг хури вә-

руңкве эрыс.

Мот хөтпат мольберт намба парт тармыл хурит пöслуңкве патсыт. Ты хотьют савсыр хаснэ ййвытыл, мелыл манос ольпыл пöслуңкве кәсащас, таи та вис. Акв нэ үсувт өлнэ Храм кол нупыл сунсым та кол пöслуңкве патыс.

Лена увшим школат ханищтахтаме порат ос сака ёмашакв пöслуңкве хасыс, ань тав мән Саранпавыл ляпат үнлын Нёранув суссылтаңкве тахмаяс ос таиянэ пöслыс. Геннадий Степанович кәсың хөтпа ляпан ёхталас, тән ётаныл потыртас манос матыр урыл хұлтыглас.

Тувыл мүй махум музей колн щалтсыт. Тот «Хөтал» намба обско-угорский театрыт рүпитан хөтпат ос «Эргыт, ййквыт пувлын махум» намба коллектив пұмыш ёнгылыт вәрсыт ос мощ тұлыглахтасыт.



Надежда Вахварум-хури

Тот мүй махум элы-пәлт культурат рүпитан кұцаит ос кит искусствовед-нэг Надежда Владиленовна Сухорукова, Наталья Николаевна Фёдорова потыртасыт. Тувыл «Диалоги с Райшевым: Надежда Талигина «Медвежья игрища» суссылтапе сунсуңкве вöввёсыт.

Надежда Михайловна ханты нэ, тав Сыня я вәтат Ямалт самын патыс. Мән тәгыл савсыр мұтрат вәңкве яныгхөтпатныл ханищтахтас, матыр пёс накыт өвылтыт аква пұмшалахтас. Ты нэ совыл, хұлсовыл, нуил, төрыл пормасыт юнты, сакныл хорамың утыт харты. Ань хань-

щувлам тәланэ пуссын элаль тотыянэ ос мирн суссылтыянэ.

Тав 1980 тәлт Салехард үст культурно-просветительский училище әстлас. Ётыл Москва үст С.Г. Строганов намба художественный училищат ханищтахтас. Ос Салехардыт Л.В. Лапцуй намба культура ос искусство училищат ныврамыт ханищтас. Ань история ос археология институтт наука рүпата вәри.

Надежда Талигина кәтыл нётнэг вәрум пормасанэ мағыс «Мәштыр намыл» маима олы, ты коныпал история наука учёный нам вуянтас. Сыньский ханты махум культураныл урыл сав потрыт



ПУСТАҒЫЛ ӨЛЭН



ос нәпакыт хансыс, тувыл катыл нётнэ хурит пöслы. Касың пöслум хуритөт Надежда Михайловна лүйма олупсат элумхолас такыг өлнэ ёре ос ёр номтэ суссылтытэ. Тав пöслум хуриянэ Москва, Салехард, Санкт-Петербург, Сургут, Тюмень, Ханты-Мансийск үсытыт мирн суссылтавёсыт. Сомбатхей үс Венгриян ос Женева үс Швейцария хөн мән то-тыглавёсыт. Ань тыт өс сака ёмас суссылтап вәрвес.

Тувыл мүй махум мот колнакт акванатвёсыт, тот «Музыкальное приношение» концерт олыс. Гнесиных намба академия филиалыт ханищтахтын нэг Ирина Пасхальная ос Ирина Поспелова тот эргысыг. Та юи-палт Геннадий Райшев рүпитан колэ махумн янытөт суссылтавёсыт ос «Моя Сибирь» мозаика яныг хури овылтыт потыртасыт.

Акв та сус «Природы ос Человека» намба мот музейт ос акв пумыщ вәрмалё олыс. Тот рүпитан хөтпат «Парк советского периода» суссылтап вәрыгласыт. Тән та тәлыт порат олыглам накыт щөпитәлыгласыт ос мүй махум тув мүйлуңкве

вөвыгласаныл.

Няврамыт магыс янас колнак олыс, тәнанылн советский порат пöслым мультикыт суссылтавёсыт. Вожатыиг масхатам агитпыгыт няврамыт өт пёс ёнгын утыл ёнгысыт. Тувыл тән щән-ащаныл октябрёнкаг ос пионерыг олум пораныл урыл потыртасыт. Яныгнув агиришит, пыгришит «Юный техник», «Продлёнка», «Живой уголок» намба кружокытын үрвёсыт.

Мот колнак «коммунальный квартира» щырыл вәрвес. Сартын кит-хүрум колтағыл аквөт олсыт-хүлсыт. Ань кол пормасыт аквта хольт үнтталавёсыт. Щемьян махум пёс щырыл масхатыгласыт ос олупсаныл суссылтасаныл. Няврамыт стихыт ловиньтасыт, мәнълат хөтпатгитарал, гармош-кал ёнгысыт ос эргысыт. Тувыл махум савсыр пёс ййквыт ййквуңкве ханищтавёсыт. Ты коньпал лото ёнгысыт, пёс газетат, журналыт ловиньтасыт ос сыресыр советский маркат суссыт.

Акв колнакт мүй махум щай аюңкве ос тэпьялаңкве вөрмысыт. Музейт хөтал палыт сака пұмаш олыс.

**Тамара
МЕРОВА**

Вөрт үргалахтым өлән

Ань мālтыпыг ёмтыс. Сыресыр хащтāl агмыт нэглэгыт. Ты кас-тыл мир пусмалтан департамент кұщай Александр Филимонов ляххал тотнэ хөтпат акван-атыгласанэ. Тав прививка-укол тұщтын вәрмалё урыл потыртас. Нән тав потре элалё ловиньтэлын.

– Мән касың тāl округувт өлнэ мир прививка-уколыл тұщтыанүв. Ты агмыт урыл акваг потыртэв. Мән вөрың мāt өлэв. Ань түйиғ ёмтыс өс кёрыңхомлахыт та квāлапасыт. Руш щырыл тән «клещиг» лāвавет. Тән сака тārвитын агм (энцефалит, боррелиоз) тотэгыт. Тувыл ос мот үитныл агм хāхтуңкве вөрмёгыт. Хөтпа ты үйн пурасаве ке, тав алпитэ сака исыглы, сәйттāl патуңкве вөрми ос тōрыгтаңкве патаве. Пурасам хөтпат тōват пусмалтаңкве ат вөрмавет, ты агм хосыт хотталь щалтэгыт. Прививка-укол тұщтуңкве таимагыс ты эри.

Ты коньпал мōлты тāl махум тамле агмыл ёмталасыт: ты туляремия – мāпорсүйт ос лёмвоит тотнэ агм ос описторхоз – хұлытныл сōрыгуй агм. Туляремия агмыл савыңпālэ вōраян ос үйхул янмалтан хөтпат мāk тән ты хāхтавет. Ты агм тāра ат сүйты, кит сātкем мины, уш та сумыллы. Ты агм порат хөтпа алпитэ илтыг исыглаве, аквтупмат грипп агм нупыл харты, нёвлянэ агмыңыг ёмтэгыт.



Щāпак, хулюмхұл, сорт ос мот хұлыт хосыт элумхолас «описторхоз» агмыл ёмты. Сōрыгуй ул вос оньщегын, хұланын ёмщакв пāйтын ос щāритән. Тамле тārвин ос агм хосыт хөтпа өс пōрсуңкве вөрми. Ты агмыл ёмтнән порат сымкакр шар вāгтāлыг паты, алпи ос витыг пёрыглы. Ётылнув агм тув үнты, хроническийг ёмты.

Агмыл ёмтнән порат тāра пұльницан минән. Нāнки ул пусмалтахтән. Үргалахтым өлән, вөр-ныл юв ёхтынән порат маснутанын ёмашакв сунсыглән.

**Николай
МЕРОВ**

МҮЙЛЫН ХӨТАЛЫТ

Няврамыт янытлан хөтал

Ханты-Мансийск үст өлнэ «Торум Маа» музейт няврамыт магсыл «Ворщик хөтал» нампа ялпың хөтал вәрыглавес. Ты ялпың хөтал пёс порат хөнтаң маңьци махум тән янытласыт.



Музейт рүпитан махум ты вәрмалы урыл пёс нэпакыт ос Анна Митрофановна Конькова «День трясогузки» хансум мөйтэт ловиньтасыт ос ты ялпың хөтал янытлаңкве өвылтахтасыт.

Хөнтаң маңьцит лавыгласыт, ворщик ке ёхтыс, яңк та нёвумты. Пёс порат тамле потыр ёлыс, ты товлың үй тыг ёхты, ян исы, лэгётыл яңк сакватытэ, такви товлагёт рёгың ос мал-тым хөтал ёт тоты. Ворщик луйгим турман йтит хот-нявляянэ ос туи пора лүй мән вөвитэ.

«Торум Маа» музей «Ворщик хөтал» лүпта

Этпос өвил хөталёт нилыт тал ты янытлавес. Тамле ялпың хөтал тән няврамыт үргалан хөтал кастыл вәрыглэгыт. Ань Ханты-Мансийск үст өлнэ махум ты ялпың хөтал ёмашакв вәганыл, ос касың талныл тув савмир ёхталы.

Музейт рүпитан махум агиришит-пыгришит магсыл сав пүмаш вәрыгласыт. Тән ворщик урыл мөйтэйт мөйтсыт ос ма-вит урыл савсыр амшит амщи-сыт. Няврамыт салы сун ұлтта поргысыт, тын-щаң пахвтысыт ос мөт щирыл кассыт.

**Людмила
ТАСМАНОВА**

Луима сэрипос

(Северная зоря)
№11 (1077), 6.06.2014

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Главный редактор –
Решетникова Р.Г.
Телефон (3467)33-36-82

И.о. заместителя главного
редактора – Узель В.В.
Телефон (3467)33-22-72

Ответственный секретарь –
Ромбандеева С.М.
Телефон (3467)33-23-09

Адрес редакции и издателя:

628011, г.Ханты-Мансийск,
ул.Комсомольская, 31
тел./факс (3467)33-17-52
E-mail: luima@ugracom.ru
Газета размещена на сайте
kmns.admhmao.ru

Отпечатано:

ОАО «Издательский дом
«Новости Югры» г. Ханты-
Мансийск», ул. Мира, 46.

Подписано в печать:

по графику 6.06.2014 г.
в 15.00.; фактически
6.06.2014 г. в 15.00.
Индексы 04399, 54399
Тираж 1750 экз.
Заказ 1397
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.